

□ الأسير □

وقع بصرى عليه في سجن القناطر كان يعمل في ورشة الأحذية. وكنت هناك لاصلاح شبشب أصابه العطب. وكان يبدو دون المساجين جميعا صامتا ومكسورا ومذعورا من شىء ما. وعندما سألته عن تهمته أجاب في همس :

- سياسى زيك !!

سياسى . إخوان . شيوعى ، مراكز قوى؟ جماعات إرهابية؟ كان يهز رأسه بالنفى عقب كل سؤال. ثم راح يحكى لى قصته منذ لحظة تجنيده وحتى لحظة دخوله السجن. وكان قد مضى عليه خمس سنوات كاملة ولم يبق أمامه إلا سنتان وسأل العبد لله :

- أنت كمان بعد ما تطلع من السجن هتقعده عاطل؟

- عاطل ليه؟ هاشتغل طبعا ..

- أصلهم قالوا لى إن جريمتى ماسة بالشرف .

- تبقى مش سياسى بقى .

- مش سياسى ازاي، أنا سياسى ونص. كنت باقول فى الإذاعة، دنا كنت مشهور فى عدن، والناس كانت تعرفنى هناك، بس الراجل الخواجا كان خايف على ليضربونى بالنار، بس ماكنتش عارف ليه؟ مع ان الناس هنا بتحب جلال معوض وبتتشرف بمعرفته .

- ما هو انت مش زى جلال . جلال كان مذيع بس انت خائن.

أفزعته كلمة خائن بشدة. ترك فردة الشبشب تسقط من يده وقال :

- خائن ازاي يا أستاذ، أنا عملت إيه؟ أنا كنت بتكلم فى الإذاعة. ثم

هو أنا اتكلمت فى الإذاعة بمزاجى؟ دا كان غصب عنى ثم دول عبط وأنا ضحكت عليهم، وكل الكلام اللى قلته كذب. دنا عملت خدمة للبلد

وكان لازم يكافئونى!

وصمت بعض الوقت قبل أن تنحدر الدموع على خديه، ثم هب واقفا تاركاً فردة الشبشب على الأرض وانصرف خارجاً من الورشة.